



# **PARTORDING NI ACARA PARMINGGUON MINGGU IV DUNG TRINITATIS**

**HKBP TAMAN WISMA ASRI  
BEKASI UTARA**

**Ev. Psalmen 89 : 15 - 18      Ep: Mateus 10 : 40 - 42**

**TOPIK:**

**“MANGHANGOLUHON HATIGORAN  
DOHOT ASI NI ROHA NI DEBATA”**

**(HIDUP DALAM KEADILAN DAN KASIH SETIA TUHAN)**



**HURIA KRISTEN BATAK PROTESTAN  
Minggu, 02 Juli 2023**

**00. JOUJOU TU PARMINGGUON:**

**U** : Huria na hinaholongan ni Tuhan Yesus Kristus, selamat hari minggu ma di hita saluhutna!

**H** : **Selamat hari minggu ma tutu di hita angka nahinaholongan ni Tuhan Yesus!**

**U** : Dibagasan unduk dohot serep ni roha, jomolo ma hita martangiang na hohom dipamuhai ni parminguonta on,!

**H** : **(Martangiang na Hohom...diiringi musik satonga soara)**

**U** : Amen. Goar ni minggu-ta sadarion ima **MINGGU PAOPATHON DUNG TRINITATIS** dohot topik **“MANGHANGOLUHON HATIGORAN DOHOT ASI NI ROHA NI DEBATA”**. Antong, tapuji ma Tuhanta, marende ma hita!

**01. Marende BE. No.9 : 1 - 2 “HUPUJI HOLONG NI”**

1. Hupuji holong ni rohaMu O Tuhan Yesus rajangki  
Tu Ho hulehon ma tondingku Ai i do pinangidoMi  
Huhalapahon ma diringku Mamingkir holong ni rohaMu

..... *(Jongjong)*

2. Sai dilului Ho do ahu Au pe huhalungunhon Ho  
Ditaiti rohaMi rohangu Dibahen i hulehon do  
Dipillit Ho hian tondingku I pe hutodo Ho Tuhanku

**02. VOTUM – INTROITUS – TANGIANG: A.XV.A.5 / D.XIII.40**

**U** : Marhitehite Goar ni Debata Ama dohot Goar ni AnakNa, Tuhan Yesus Kristus, dohot Goar ni Tondi Parbadia, na tumompa langit dohot tano on. Amen. Mangasahon Debata sai hamonangan do ulahononta. Ngot ma ho, ale parhinaloan ! Tarsunggul ma ahu di buha siang ari. Pujionku ma Ho di tongatonga ni angka bangso, ale Tuhan, endehononku ma Ho di tongatonga ni angka marga. **Haleluya!**

**H** : **(Mangendehon: Haleluya, Haleluya, Haleluya!).**

**U** : **Martangiang ma hita:**

Ale Tuhan Debata, Parasiroha na sumurung ! Mauliate ma rohanami tu Ho, ala dijou Ho hami tu pangkirimon di hangoluan saleleng ni lelengna. Sai lehon ma TondiM tu rohanami, asa margogo hami mangalo hisaphisap ni rohanami jala asa hulului hami, angka na di banua ginjang i. Pargogoi ma hami manaluhon saluhut na naeng mangambat hami tu hasonangan. Sai paganda haporseaon, pangkirimon dohot pamompomon ni rohanami, asa monang hami ro di ujungna, laho manjalo tumpal i hami di joloM ala ni AnakMu, Tuhan Yesus Sipangolu i. Amen.

..... *(hundul)*

**03. Marende BE. No.183 : 1 + 3 “NA JUMPANG AU”**

1. Na jumpang au na asi roha, di au naung mago i hian  
Tuhan Yesus parasi roha, di au na lili na hinan  
Nuaeng hutanda Tuhanki, parasi roha bolon i, parasi roha bolon i

3. On pe holan asi ni roha, sipangasahononhon i  
Sipujionku do Jahowa, dung ro na pamanathon i  
Unduk huhut las rohangki, mamuji asiroha i, mamuji asiroha i.

**04. PATIK:**

U : Tangihon hamu ma Patik ni Debata di Minggu-ta sadari on, i ma nanienet sian  
**5 Musa 7 : 9.**Dibahen i tama ingkon botoonmu, Jahowa do Debatam, Ibana  
do Debata na sintong jala na bonar, na pasintong padan dohot asi ni roha tu  
halak, angka na mangkaholongi Ibana dohot tu angka na mangaradoti  
tonana, pola marriburibu sundut.

**Ido sahatna, Antong rap mangido gogo ma hita sian Tuhan Debata !**

**S : Ale Tuhan Debata, sai pargogoi ma hami mangulahon na hombar tu  
PatikMi. Amen.**

**05. Marende BE.No.681 : 1 - 2 “ALE AMANG ASI ROHAM”**

1. Ale Amang asi rohaM, di au pardosa on,  
Unduk do rohankon nuaeng, marsomba di joloM.  
Unang jujur unang jujur, angka dosangki.  
Sai salpuhon sai salpuhon, sian rohaMi

*. ..... (Jongjong)*

2. Amang sai pargogoi ma au, di hasiangan on,  
TondiM pasaor tu tondingkon, pamalum rohankon.  
Sai usehon, sai usehon, TondiMi tu au,  
Asa monang maralohon, parungkilon au.

**06. MANOPOTI DOSA : B.4 – C.8**

**U : Huria ni Tuhanta, tatopoti ma dosanta na godang i tu adopan ni Debata,  
martangiang ma hita:**

Ale Tuhan Debata, Amanami, Pargogo na so hatudosan, Parasiroha mida  
hami na dangol on ! Na ro do hami tu joloM manopoti dosanami na godang i.  
Di bagasan hajahaton do hami tubu jala ndang adong haporseaon di bagasan  
rohanami hian, saluhut do hami manimbil sian angka dalanMu. Mansai  
godang do pangalaosionnami di PatikMu. Alai ingot ma hami, ale Tuhan, ala  
ni denggan ni basaM dohot asi ni rohaM. Sai unang paingotingot angka dosa  
ni haposoonnami dohot pangalaosionnami; sai ingot ma hami hombar tu asi  
ni rohaM dohot denggan ni basaM ala ni GoarMu. Ale Tuhan Jesus,  
marpamuati ma rohaM di dosanami na godang i ! Amen.

*Tingki na hohom manghuling musik satonga suara*

**Bagabaga ni Debata taringot tu hasesaan ni dosanta:**

Songon on do Hata ni Tuhan Jahowa: Nunga pola hupasisi angka  
pangalaosim songon ombun, jala songon ombun manorop angka dosam. Sai  
mulak ma ho tu Ahu, ai Ahu do Sipalua ho.

**Hasangapon ma di Debata na di ginjang !**

**S : Amen .....(hundul).**

**07. Marende BE. No. 690 : 1 - 2 “HIBUL ROHANGKU”**

1. Hibul rohangku tu Tuhan Yesus,  
Sude ngolungku di Tuhan Yesus,  
lhuthononku di Tuhan Yesus,  
Ndang olo au sumurut be.
2. Sai hutundalhon haportibion,  
Silang ni Kristus ma hudapothon,  
Sai hutundalhon haportibion,  
Ndang olo au sumurut be.

**08. E P I S T E L : (RESPONSORIA)**

**U : Tabege ma Hata ni Debata turpuk Epistel di ari Minggu sadari on, ima na tarsurat di Mateus 10 : 40 - 42 Tajaha ma marsorinsorin: Na manjangkon hamu, Ahu do jinangkonna: Jala na manjangkon Ahu, Na marsuru Ahu do jinangkonna disi.**

**H : Na manjangkon panurirang, ala targoar panurirang, dapotan upa ni panurirang; na manjangkon partigor, ala targoar partigor, dapotan upa ni partigor.**

**U : Na painumhon aek tabar santahu tu sahalak sian angka na metmet on, ala targoar siseanku ibana: Na tutu situtu do na hudok on tu hamu, ndang na mago upana!**

***Ido sahatna, Martua ma angka na tumangihon Hata ni Debata jala na umpeopsa.***

**S : Amen.**

**09. KOOR .....**

**10. Marende BE. No.238 : 6 - 7 “IHUTHON AU SUDE HAMU”**

6. Siparhamaol hosana i, i ma agoan hosa  
Alai na sumeahon i, i do pangoluhonsa  
Na so mamorsan silang i, na so tama di Au ma i  
.....(*jongjong*)
7. Antong girgir ma hita be, lao mangihuthon Jesus  
Dagingta nang tondita pe, talehon ma tu Jesus  
Ai na manjua Tuhan i, ndang dapot hasonangan i

**11. MANGHATINDANGHON HAPORSEAON:**

**U : Tahatindanghon ma haporseaonta i, songon na hinatindanghon ni donganta sahaporseaon di sandok portibi on. Rap ma hita mandok:**

**R : Ahu porsea di Debata Jahowa, i do Ama, Pargogo na so hatudosan na tumompa langit dohot tano.**

**Ahu porsea di Jesus Kristus, Anak ni Debata Jahowa, na sasada i; i ma na tinubuhon ni si Maria na gabegabeaon sian Tondi Parbadia andorang so**

habubuhan; i do Tuhanta, na tumaon na bernit di panguhuman ni si Latus; na mate tarpajal do lbana di hau pinarsilang, na tuat tu banua toru, dung ditanom, na mulak mangolu di ari patolubon, na manaek tu surgo laho hundul tu siamun ni Debata Jahowa, AmaNa i, Pargogo na so hatudosan i, disi ma lbana, paima mulak sogot tu tano on manguhumi halak na mangolu dohot na mate.

Ahu porsea di Tondi Parbadia, jala adong sada huria na badia, Huria hatopan ni halak Kristen angka na badia, dohot di hasesaan ni dosa, dohot di Hata i, na mandok: Mulak mangolu sogot daging ni halak naung mate, dohot di hangoluan na so ra suda.

**Amen.** .....(*hundul*)

## **12. TINGTING + TANGIANG PANGONDIANON**

### **13. Marende BE. No.761 : 1 ---- “MARTUA NA PORSEA”**

(*Pelean: Ia & Ib Huria*)

1. Martua na porsea na hot di Tuhan i,  
Bolong holso ni roha dao nang biar i,  
Holang sian na jahat donok do Tuhan i,  
Di angka na porsea na tinobusNa i.
2. Maporus do dakdanak tu natorasna i,  
Ditingki parmaraan sihabiaran i,  
Maporus tu Tuhanta do na porsea i,  
HataNa i sinjatana di paraloan i.  
---- *Musik* ----
3. Dung sahat tu labuan angka parsolu i,  
Sonang do dihilala dao galumbang i,  
Sumonang na porsea di huta Sion i,  
Labuan saleleng na do hasonangan i.

### **14. JAMITA : Psalmen 89 : 15 – 18**

- 89:15 \* Hatigoran dohot uhum do ojahan ni habangsami, \* asi ni roha dohot hasintongan patujolo ni bohim.
- 89:16 Martua ma bangso na umboto olopolop! Angka na marpangalaho di bagasan hatiuron ni bohim, ale Jahowa.
- 89:17 Sai marolopolop do nasida manipat ari marhitehite goarmu, jala timbul do nasida hinorhon ni hatigoranmu.
- 89:18 Ai Ho do saudara ni hagogoonnasida, jala hinorhon ni habasaonmi do manuarang tanduknami.

**15. Marende BE. No.573 : 1 ---- “PUJI JESUS SIPALUA”**

*(Pelean: II)*

1. Puji Jesus puji Jesus Sipalua  
Langit tano marolopolop ma.  
Haleluya puji ma Tuhan Jahowa  
Tapasangap goar ni Debata  
Tuhan Jesus do marmahani hita  
Arianna nang bodarina pe  
Puji hatindangkön ma hamuliaonNa  
Taendehon sangap di Debata.

2. Puji Jesus, puji Jesus Sipalua  
Tapasangap ma Tuhan Debata  
Dolok batu sihirimon ni rohanta  
Dipapatar di dolok Golgota  
Haleluya diapul do rohanta  
Dibaen dengan basa ni Debata  
Puji hatindangkön ma hamuliaonNa  
Taendehon sangap di Debata.

*---- Musik ----*

3. Puji Jesus, puji Jesus Sipalua  
Hosianna pangiar soaram  
HarajaonNa hot do ro di salelengna  
Jesus Kristus anak ni Debata  
Ai Ibana Raja ni angka raja  
Na sun gogo gumomgom tano on.  
Puji hatindangkön ma hamuliaonNa  
Taendehon sangap di Debata.

**16. TANGIANG PANGUJUNGI ..... *(jongjong)***

- Tangiang Pelean
- Tangiang Ale Amanami
- Pasu Pasu
- Amen, Amen, Amen.

**\*\*\*\* Ibadah Selesai \*\*\*\***